

URDHËR
Nr.158, date 9.4.2013

**PËR CAKTIMIN E NUMRIT TË PËRGJITHSHËM TË NOTERËVE DHE NUMRIT TË TYRE
PËR ÇDO RRETH GJYQËSOR, SI DHE MBULIMIN PËRKATËS PËR ÇDO BASHKI, SË
BASHKU ME KOMUNAT PRANË SAJ**

Në mbështetje të nenit 102 pika 4 të Kushtetutës, të nenit 7 pika 2 të ligjit nr. 8678, datë 14.5.2001 “Për organizimin dhe funksionimin e Ministrisë së Drejtësisë”, të ndryshuar, dhe të neneve 3 dhe 16 të ligjit nr. 7829, datë 1.6.1994 “Për noterinë”, të ndryshuar,

KONSTATOJ SE:

Noteria, si profesion i lirë në Republikën e Shqipërisë, zë një vend të veçantë për shkak të rëndësisë së rolit të tij në stabilitetin e veprimeve juridike dhe vërtetimit të akteve. Për shkak të kësaj rëndësie, ligji nr. 7829, datë 01.06.1994 “Për noterinë”, ka parashikuar një numër të kufizuar noterësh, në mënyrë që të ruhet ekuilibri, nga njëra anë, midis aktivitetit të tyre ekonomik dhe rolit të tyre si funksionar publik, dhe nga ana tjetër, cilësisë dhe shpejtësisë në ofrimin e shërbimeve noteriale kundrejt qytetarëve në njësitë vendore.

Me urdhër të Ministrit të Drejtësisë nr. 2140, datë 18.3.2011 “Për caktimin e numrit të përgjithshëm të noterëve dhe numrit të tyre sipas njësive vendore”, numri i përgjithshëm i noterëve është 378. Sipas nenit 16 të ligjit nr. 7829/1994, Ministri i Drejtësisë, në bazë të numrit të popullsisë dhe të vëllimit të punës së veprimtarisë noteriale, pasi të ketë marrë mendimin me shkrim të Dhomës Kombëtare të Noterisë, cakton çdo dy vjet numrin e përgjithshëm të noterëve për çdo rreth gjyqësor, si dhe mbulimin përkatës për çdo bashki, së bashku me komunat pranë saj.

Duke qenë se në datë 18.3.2013 është plotësuar afati dyvjeçar i rishikimit të mëparshëm të numrit të përgjithshëm të noterëve, si dhe duke mbajtur në konsideratë zhvillimet dhe kompetencat e fundit që i janë shtuar noterëve, është e detyrueshme rishikimi i numrit të përgjithshëm të noterëve dhe i numrit të tyre sipas njësive vendore, bazuar në kriteret ligjore të mëposhtme:

- a) Numrin e popullsisë së bashkisë, së bashku me komunat rreth saj;
- b) Vëllimin e punës së veprimtarisë noteriale.

Në lidhje me kriterin e parë, Ministria e Drejtësisë, me anë të shkresës nr. 79/5, datë 19.3.2013, i ka kërkuar informacion Ministrisë së Brendshme lidhur me numrin e popullsisë për çdo komunë dhe bashki të vendit, të ndara sipas qarqeve. Kësaj kërkesë, Ministria e Brendshme i është përgjigjur me shkresën nr. 2046/1, datë 26.3.2013, duke vënë në dispozicion informacionin e plotë të kërkuar. Ndërkohë, në lidhje me kriterin e dytë, janë përdorur të dhënat për veprimtarinë noteriale të dërguara nga Dhoma Kombëtare e Noterisë.

Procesi i caktimit të numrit të përgjithshëm të noterëve, si dhe shpërndarja e tyre në njësitë vendore, duhet të udhëhiqet nga kriteret e vendosura nga ligji, si dhe nga parimet e efikasitetit dhe shpejtësisë së shërbimit, mbulimit me shërbim noterial të të gjitha njësive administrative vendore, ngarkesës së noterëve, si dhe numrit të veprimeve noteriale për çdo banor. Përmeshja njëherazi i të gjitha kriterëve dhe parimeve që duhet të udhëheqin këtë proces, kërkon analizimin me kujdes të numrit të noterëve për çdo njësi vendore, numrit të popullsisë, numrit të veprimeve noteriale, si dhe nevojën për vende vakante gjatë dy viteve të ardhshme. Kjo analizë është kryer nga një grup pune i përbërë nga përfaqësues të Ministrisë së Drejtësisë dhe Dhomës Kombëtare të Noterisë nëpërmjet studimit nr. 79/7 Prot., datë 1.4.2013.

PËR KËTË ARSYE:

Në mbështetje të neneve 3 dhe 16 të ligjit nr. 7829, datë 1.6.1994 “Për noterinë”, të ndryshuar, si dhe studimit të datës 1.4.2013,

URDHËROJ:

1. Numri i noterëve që ushtrojnë veprimtarinë e tyre në territorin e Republikës së Shqipërisë, për dy vitet e ardhshme, të jetë 443 (katërqind e dyzet e tre).
2. Numri i noterëve sipas njësive vendore, për dy vitet e ardhshme të jetë sipas aneksit nr. 1, bashkëlidhur këtij urdhri dhe pjesë përbërëse e tij.
3. Shpalljen e vendeve vakante për njësitë vendore, sipas aneksit nr. 2, bashkëlidhur këtij urdhri dhe pjesë përbërëse e tij.
4. Urdhri nr. 2140, datë 18.03.2011 “Për caktimin e numrit të përgjithshëm të noterëve dhe numrit të tyre sipas njësive vendore”, revokohet.
5. Ngarkohet Sekretari i Përgjithshëm për ndjekjen dhe zbatimin e këtij urdhri.
6. Ky urdhër hyn në fuqi menjëherë dhe botohet në Fletoren Zyrtare

MINISTRI I DREJTËSISË
Eduard Halimi